# DISCOVRS

SVR LE

GOVVERNEMENT

MONARCHIES
ET PRINCIPAVTEZ
SOVVERAINES

Par Messire I ACQUES RIBIER Conseiller du Roy en son Conseil d'Estat.



A PARIS,
Chez Seba's tien Cramoisy, ruë S. Iacques,
aux Cicognes.

M. DG. XXX. AVEC PRIVILEGE DV ROT.



# THEMENT

## MINARCHIE

THE STATE OF THE PARTY OF THE P

 $\mathcal{X} \times \mathcal{X} \times \mathcal{Q} \subset \mathcal{X} \times \mathcal{X}$ 

## Propiesta de la crecia del la crecia del la crecia del la crecia de la crecia de la crecia de la crecia del la crecia de la crecia del la crecia de la crecia de la crecia del la crecia de la crecia del la crecia de la crecia del l

### PRIVILEGE DV ROY.

Ovis par la grace de Dieu Roy de France & de Na-uarre, Au Preuost de Paris ou son Lieutenant, & tous autres Baillifs, Seneschaux, ou leurs Lieutenans, chacun endroit foy, comme il apparriendra, Salur. Nostre amé & feal Confeiller en nostre Confeil d'Estat le sieur Ribier, desireroit, sous nostre bon plaisir, faire imprimer & mettre en lumiere vn liure par luy compose, intitule, Memoires & aduis concernant les charges de nos tres-chers & feaux Chanceliers & Gardes des Seaux de France, & autres discours : & nous a supplié luy octroyer nos lettres sur ce necessaires. No v s A CES CAVSES luy auons permis, & de nostre grace speciale, pleine puissance & auctorité Royale, permettons mettre en lumiere, faire imprimer & debiter ledit liure par tels Imprimeurs & Libraires que bon luy semblera, sans que durant ledit temps & espace de six ans, aucuns Imprimeurs & Libraires, ny autres puissent imprimer, vendre ny debiter ledit liure sans sa permission, à peine de confiscation de tous les exemplaires, despens, dommages & interests, & relle amende que le cas le requerra. Leur faisant tres-expresses inhibitions & defenses dy contreuenir; & your mandons, & à chacun de vous en droit foy, commettons y tenir la main, & empescher qu'il n'y soit contreuenu par qui que ce foit. A la charge que ledit fieur Ribier fera tenu de mettre en nostre Bibliotheque deux des exemplaires reliez duditliure. Cartel est nostre plaisir. Donné à Dijon le 10. iour de Mars 1619. Et de nostre regne le dix-neuf.

Par le Roy en son Conseil,

DELAFON.

Lédit sieur R ibier a chois & esseu Sebastien Cramoisy Marchand Libraire Iuré en l'Université de Paris, pour imprimer ou faire imprimer ledit liure, & ioùyr du Prinilege cy dessus mentionné, durant le temps & espace porté par iceluy. Fait le ringt-deuxiesme Mars mil six cens vingt-neus.



## DISCOVRS

SVR

## LE GOVVERNEMENT DES MONARCHIES

& Principautez souueraines.

E n'est pas sans grande raison que ce sage ancien disoit, qu'il ne falloit iamais approcher des Roys & Princes souverains, qu'auec ceste ferme resolution de leur dire franchement la verité; dautant qu'ordinairement toute dissimulation n'est pas seulement lasche & seruile, & indigne d'vn homme de bien, mais encores preiudiciable à ceux ausquels on cache & on déguise auec art & dessein ce qui se passe dans le monde. Et s'il est quelquesfois excusable desertenir par respect & modestie dans le silence, comme il n'est pas tousiours à propos de s'ouurir & se declarer, & que ce seroit vne manifeste imprudence de dire hors de saison ses pensées & sentimens; aussi faut-il recognoistre qu'il y a vn autre silence vicieux & reprochable, qui naist ou de lascheté, ou de malignité. Ét c'est pourquoy vn ancien Prince

plaignant sa codition, auo üoit que l'estat des Grands. estoit plein de beaucoup de maux, mais qu'il n'y en auoit point vn plus grand que celuy-cy, que nul de leurs fauoris n'oseroit le plus souuent parler à eux auecfranchise, & leur faire fidellement entendre la verité. Et certainement ceux qui l'ont escoutée & foufferte patiemment, se sonttrouuez bien seruis, & ont veu leurs Estats prosperer; au lieu que les autres qui l'ont reiettée, & preferé la voix d'un flateur à celle d'vn fidele ministre & seruiteur, ont esté la pluspart infortunez, & aucuns d'eux reduits à chastier seuerement ceux qui par ceste dissimulation & conniuence auoient traliy ou gasté leurs affaires. Mais quand cette verite le trouue accompagnée de la submission & reuerence qui se doit tousiours au maistre & au Souuerain, & qu'on sçait prudemment adoucir l'amertume des choses par les bonnes & agreables paroles, comme ce gentil Poëte nous a voulu figurer par son doux & gracieux nepenthe, c'est lors que ceste liberté ainfi affaisonnée est bien receuë, & qu'elle produit de grands & vtiles effets. Nous auons en ce Royaume vn iuste suiet de nous louer de la bonté de nos Roys, qui n'ont iamais fermé l'oreille aux falutaires aduis qui leur ont esté donnez, mais ont tousiours pris en bonne part les remonstrances qui leur ont esté fait es, & en public, & en particulier, pour le bien de leur Estat. Aussi pouvons nous dire à l'honneur de nostre France, que bien qu'aux autres Estats les bons Princes ayent esté si rares, qu'on croit que celuy-là a bien rencontré qui a eferit qu'ils pouuoient

estre tous enclos au rond d'vnanneau, & que mesme entre le peuple de Dieu nous voyons qu'il y a eu beaucoup plus de mauuais Roys que de bons; si est-il veritable que repassans par les trois lignées de nos Roys, nous en trouuerons en chacunede si excellens & en paix & en guerre, si recommandables tant pour leur valeur que pour leur sage conduite, que nous serions tresingrats, fi nous ne recognoissions pour vn singulier benefice de Dieu d'estre nais sous de si bons maistres & si grands Roys. Et c'est ce qui nous fait esperer que ce Discours, qui part d'vne ame toute deuote à leur grandeur, & à l'accroissement de leur dignité Royale, sera veu de bon œil & receu fauorablement, mesme par vn Roy que Dieu nous a donné si accomply, qu'il semble auoir voulu faire en sa personne comme yn amas de toutes sortes de vertus & de perfections. CHACVN fçait que ç'a esté vne celebre question traictée par les plus grands hommes de tous les siecles, touchant la forme du gouvernement des Estats, laquelle deuoit estre estimée la plus parfaicte; les vns ayans donné leurs voix & suffrages aux Republiques, les autres aux Monarchies. Et quoy que pour concilier ces opinions differentes, & pour rendre l'vn de ces Estats plus desirable, on ayt voulu faire distinction du naturel & inclination des peuples, comme estans les vns plus propresà obeir qu'à commander, siest-ce qu'enfin la plus commune refolution a esté que la Monarchie, comme l'image de la diuinité, qui est vne, doit estre tenuë plus excellente & plus fouhaitable, ny que l'Aristocratie où peu

gouvernent, ny que la Democratie où le peuple a la supreme puissance: yeu mesmes qu'en ces deux deiniers Estats, lors qu'il y estarriué du trouble, ou quelques accident extraordinaire, on a tousiours eu recours à la personne d'yn seul pour ordonner souuerainement des affaires, & les manier auec tout pouuoir & auctorité. Heureux donc les peuples qui ont à viure sous les iustes Monarchies, & principalement lors qu'elles sont hereditaires comme la nostre, &non electives; Dautant qu'en celles-cy les brigues, factions & partialitez ont lieu le plus souuent en chacune mutation, & tout y est plein de trouble & de tumulte; En celles-là on est tellement accoustumé de viure sous la domination de la lignée regnate, que les changemens s'y passent comme insensiblement & en paix, & sans aucun remuement. Dauantage il est certain que les Princes qui montent au throsne par droict successify sont bien plus affeurez, &s'y maintiennent beaucoup plus facilement que ceux qui y viennent par election; laquelle ne plaisant à tous donne plus de peine à se garentir de la hayne & du mespris des peuples; où les autres n'ont qu'à suiure le chemin battu, entretenir l'ordre estably, & se conseruer par les mesmes moyens que les Estats ont esté fondez. Il est bien vray qu'il y a eu de grands personnages qui se sont imaginez des Republiques, & Principautez, lesquelles ne se sont iamais veues ny recogneues qu'en idée; & sur cela nous ont donné des regles & maximes d'Estat plustost selon leur desir & fantaifie, que selon la verité: Mais ils se sont grande-

ment mescontez; dautant qu'il se faut tousiours appuyer fur les choses reelles & essentielles, & y appliquer ses maximes, & non sur les choses qui ne conlistent qu'en vne pure imagination. Les vrays fondemens de tous Estats, & sans lesquels ils ne peuuent prosperer, ny mesme longuement subsister, sont la Religion, la Iustice, les armes, & les finances. Si vn Prince n'a vne vraye pieté, s'il n'a vn soin tres-particulier du seruice de Dieu, s'il ne rapporte toutes ses actions à la gloire de son nom, s'il souffre que les vices se multiplient en son Estat, s'il en donne l'exemple luy mesme, peut-il esperer vn heureux succez en les entreprises, & d'attiter sur soy les graces & benedictions du Ciel? Doit-il pas au contraire apprehender le iugement de Dieu, les menaces de ses Prophetes, & qu'il ne le visite en son ire, & déploye fur luy & fur son Estat les fleaux de sa rigoureuse Iustice? Les siecles passez ne nous fournissent-ils pas trop d'exemples deplorables de tant de Roys de la Iudée, & tant d'autres Roys & Empereurs Chrestiens, qui ont esté si rudement chastiez ? Car bien que Dieu par les secrets impenetrables de sa Prouidence, ayt laissé dominer sur la terre des Payens & Infideles, & permis encores pour nos pechez l'heureux progrez de l'Empire des Ottomans, & de leurs semblables, si tiendra-il tousiours pour inexcusables les Princes aufquels il a donné la cognoissance de sa verité & de sa Parole, & qui l'auront ou rejettée, ou profanée par leurs mauuaises œuures. Et ce sont ceux-là qui font menacez d'vn beaucoup plus rigoureux traictement que les autres. Mais aussi pouvons-nous pas dire que les Princes qui ont pour but & principal obiet le seruice de Dieu & l'exaltation de son Eglise, n'ayans point de plus grand zele que de rendre à sa Majelté diuine le mesme honneur & hommage, la melme subiection & recognoissance qu'ils desirent de leurs peuples, se voyent tousiours fauorisez d'enhaut, & leurs entreprises accompagnées de toute forte de felicité? Et certainement tous Estats sont heureux ou mal-heureux, se trouuent bien ou mal gouuernez, selon les vertus ou les vices des Princes, & leur exemple agist necessairement pour donner le mouuement à vn Estat : dautant que les peuples imitent d'ordinaire les mœurs & qualitez bones ou mauuaises de ceux qui commandent, ausquels aussi on impute souvent auec raison les fautes des sujets; Estant vrayement le Prince, le miroir dans lequel ils se regardent, le patron & le modele sur lequel ils se forment, brefla source publique dans laquelle chacun va puiser ; de sorte que si elle est empossonnée le venin se respand incontinent, & infecte toutes les parties du corps de l'Estat. La suitte des bons & vertueux Princes qui succedent les vns aux autres, rend les Estats florissans & triomphans; & c'est la marque certaine & infallible de la grace de Dieu sur vn Estat, de luy enuoyer de bons Roys; & au contraire vn tesmoignage tres-exprés de son ire lors qu'il en suscite de mauuais, tant pour vn chastiment vniuersel, que pour abaisser la grandeur des Royaumes. Que doiuét donc les peuples demander à Dieu plus ardemment que de bons 7

& vertueux Roys? Quels vœux, quelles supplications plusiustes luy peuuent-ils addresser, que de n'en donner point en sa fureur, mais que luy-mesme les conduise par son Esprit au maniement de leurs Estats? Et n'est-ce pas aussi la priere continuelle que doiuent faireà Dieu de tous leurs cœurs les Princes qui le craignent, d'augmenter en eux & exciter de plus en plus la Pieté, & pour comble de ses graces leur inspirer ceste sapience & intelligence tant desirée des bons Roys, comme necessaire pour bien & heureusemet regner? Svivons par la Iustice, seconde colomne des Estats, & sans laquelle toutes Principautez ne seroient que brigandages. C'est elle qui affermist le sceptre en la main des Roys, & Dieu menace de transferer les Royaumes à cause de l'iniustice & de l'iniquité. Les Princes donc qui se veulent maintenir, & se rendre agreables à Dieu, duquel ils exercent le iugement, doiuet employer tous leurs foins pour faire que la Iustice foit sincerement renduë à leurs subiects, & que les plus puissans n'oppriment point les foibles; mais comme ceste Iustice a ses poids & ses nombres, qu'elle soit aussi distribuée à tous auec vne proportion égale, sans acception de personne. Et ne sçait-on pas comme Cyrus fut repris d'auoir plustost consideré en son iugement la commodité & bienseance que le droit des parties ? Les mesmes Princes sont obligez de coseruer soigneusement les loix anciennes & fondamentales de leurs Estats; parce qu'aussi-tost qu'ils les heurtent, & qu'ils fortet du gouvernemet civil, equitable & moderé, fous lequel les peuples ont vescu, ils ébranlent les fondemés

de leur legitime puissance, & commencentà perdre la bienueillance publique. Et quoy qu'ils se fassent obeir par vn commandement absolu, si est-ce que l'obeissanceainsi rendue par cotrainte n'est pas vne vraye obeissance; & se peut dire veritablement que les vertueux Officiers & Ministres, qui se monstrét religieux obseruateurs des loix & ordonnances anciennes, & empefchent autant qu'ils peuuet par humbles remonstraces qu'elles ne soient changées & alterées cotre le vray seruice du Prince, obeissent mieux que les autres, qui par complaisance ou mollesse & timidités'accommodent & fléchissent trop facilement. Ceux qui ont discouru de nostre Monarchie, mesmes quelques estrangers, ont remarqué aueclouage, qu'il ne se trouve point d'Estat au monde mieux reglé que le nostre : & ont particulierement estimé que l'establissemet des corps & compagnics souveraines auoit esté d'vn grand poids & consideration,& ordonné par vne singuliere prudence. Età la verité les hommes fages qui policeret nostre Royaume sous l'authorité de nos Roys, recogneurent bien d'un costé l'ambition ordinaire des Grands, & iugeret necessaire de s'y opposer auec art & dexterité; & d'vn autre costé s'apperceuret bien de la hayne des Peuples contre les plus puissans, fondée sur la crainte qu'ils ont d'eux,&d'en estre mal traictez. Ils vouluret doc asseurer les vns & les autres, sans les aliener de l'amour de nos Roys. Et pour oster l'opinió que leurs Majestez fauorisassent ou les Grands cotte le Peuple, ou le Peuple contre les Grands, ils trouueretà propos de constituer des Iuges comme mediateurs entre les Grands & le Peuple,

afin non seulement de tenir chacun en deuoir, & empescher l'oppression des foibles, mais aussi pour descharger nos Roys, & de l'enuie, & des importunitez ordinaires. Et encor par vn secret d'Estat d'vne rare prudence, ils aduiserent que nos Roys pour se concilier la bienveillance de tous leurs sujets se reservassent les affaires de grace & de faueur; mais que celles qui dependroient purement de la Iustice fussent maniées parleurs Officiers & Magistrats. Et dauantage, que nos mesmes Roys ne dedaignassent point de se sousmettre pour le iugement de leurs droicts & pretentions à leur Iustice souveraine, mais souffrissent qu'elle leur fustrenduë & administrée comme aux particuliers. Ce qui seruiroit d'vn puissant exemple pour faire honorer la Iustice par tous leurs sujets de toutes conditions. L'ordre certainement ne pouuoit estre meilleur, ny plus sagement estably pour la durée & seureré du Royaume. Car quoy qu'il semble de premiere rencontre bien difficile de contenter également & les Grands & le Peuple, si est-il certain qu'vn Prince prudent qui sçaura mettre vn bon ordre à ce que la lustice soit renduë auec toute integrité aux vns & aux autres, & à ceste fin remplir dignement les places de Iudicature par toutes ses Prouinces, de gens de bien, capables & incoruptibles, choisis tant du corps de la Noblesse que du Peuple, sera vniuersellement aymé, & regnera dautant plus seurement qu'il se trouuera fortifié d'vn grand nombre de personnages espandus par tout son Estat, lesquels ornez de probité & de suffisance ne luy manqueront iamais de fidelité. On a fait ceste question sur le subiect de la Iustice, s'il est plus expedient en fait d'Estat d'vser de clemence que de rigueur; & ceste mesme demande en attire & enchailne vne autre, non moins importante, s'il est plus seur aux Princes de se faire craindre qu'aymer. Nous dirons donc que bien qu'il soit quelquesfois necessaire d'apporter de la seuerité en la punition des crimes, que si toutesfois elle n'est bien temperée & accommodée au temps, si elle vaà l'excés & degenere en cruauté, non seulemet elle est blasmable, mais aussi dangereuse. Il y a de verité des fautes inexcusables, & lesquelles pardonnées rendroient les peuples insolens, comme les reuoltes, les seditions, & attentats publics, qui sont tous pechez irremissibles, & qui requierent, non pour se venger, mais pour s'asseurer, de notables exemples; Mais ce sont coups qu'il faut frapper bien raremét; & quand on y est force, en vier auec prudence; melmes que la Iustice se fasse tout à la fois, non par redoublemens & reprises, afin qu'elle offense moins, tout ainsi que les bienfaicts & les graces se doivent faire peu à peu, afin qu'on les ressente plus long-temps. Et encores les sages ont iugé à propos d'arrester quelquesfois en telles occurrences le chastimét de plusieurs en la personne de peu, qui seruent de terreur aux autres. Car toufioursle Prince doit desirer d'estre plustost tenu pour clement & humain, que pour cruel & sanguinaire, & rendre ce telmoignage public, que c'est auec regret qu'il est contraint d'en venir aux extremitez, faisant recognoistre qu'il s'agist de la conservation

de son Estat, & du salut commun, & que par ce moyen le mal se tourne en bien; comme il est quelquesfois necessaire de couper vn membre pour sauuer le reste du corps. Les Princes qui y procedent auec ceste moderation, sans affecter la gloire d'vne trop grande seuerité, recueillent tousiours vn grand fruict de leur clemence, & sont cheris & aymez d'vn chacun: Au lieu que ceux qui se veulent rendre formidables par les supplices, & cimenter leur seureté du sang de leurs sujets, encourent leur hayne, qui tire à fa suitte les reuoltes, & bien souvent la ruine des Princes : Estant trop certain par les exemples du passé, que peu se sont sauuez lors qu'ils se sont rendus vniuersellement odieux. Ainfi, pouuons-nous dire veritablement, qu'vn Estat se perd plustost par la cruauté, qu'il ne se conserue; dautant qu'vn Prince cruel ne se peut iamais asseurer de ses sujets, ny eux prendre confiance de luy, à cause des continuelles iniures & mauuais traictemens qu'ils en reçoiuent: Où au contraise vn Prince gracieux & humain n'est pas seulement chery, mais adoré de son peuple; comme aussi est-ce le propre des tyrans & vsurpateurs d'estre cruels & sanguinaires, non des Princes legitimes. Nous dirons encores fort hardiment, & tiendrons pour maxime bien resoluë, qu'il est toussours plusseur de se faire aymer que craindre. Ce n'est pas qu'vn Prince bien conseillé doine estre si fort indulgent, qu'il en vienne en mespris. V ne lasche bonté, vne mollesse effeminée, vne tendresse de cœur employées malà propos& hors de saison, seront tousiours blasmées aux Princes qui

doiuent plustost auoir pour fondement d'estre craints, qu'exposez au mespris de leurs sujets. Mais si est-il plus souhaitable & moins dangereux, d'estre aymé & chery des siens, que craint & redouté. Car ce sont les vrayes chaisnes de diamant, & qui ne se peuuent iamais rompre, que l'amour & bienveillance des peuples. Ce sont les meilleures forteresses & les plus feures garnisons que les bons Princes puissent au oir: Et dailleurs il se peut dire que le vray amour engendre la crainte, non seruile, mais celle qui est digne de bons sujets, bien éloignée de l'autre, qui produit la hayne, & auec elle les mescontentemens & rebellions. Or ce qui rend vn Prince contemptible, eft l'opinion . qu'il donne d'estre variable & leger, inconstant & irresolu en ses opinions, lasche & pusillanime, voluprueux & prodigue; bref qu'on peut entreprendre impunément sur son authorité; qui sont tous écueils que tout sage Prince doit euiter de peur du naufrage. Mais au contraire se doit-il efforcer de faire paroistre, tant au maniement des affaires publiques, qu'en ses actions priuées, vne vraye generosité & grandeur de courage, qui ne flechisse point qu'auec la raison, & qu'on recognoisse que ses volontez ne sont point muables & flottantes ça & là au premier vent qui les poufie, ainsfermes & stables, & que la seule Iustice est la boussole qui le conduit, & est la vraye guide & maistresse de ses actions. Le Prince qui donne ceste creance de soy est tellement craint, qu'à grand' peine entreprendra-t'on iamais de troubler Ion Estat : mais ceste crainte là procede du respect &

de la reuerence qu'on porteà sa vertu, non de la hayne de ses vices & mauuaises meurs. La cause de l'vne est tousiours desirable & auantageuse, & l'autre n'est iamais sans peril. Ainsi, tout Prince prudent éuitera d'estre hay & mesprisé de ses sujets en les tenans le plus qu'il luy sera possible contens & satisfaits de sa domination; puissant moyen pour empescher toutes ligues, menées, & factions. Car quiconque se rend chef de part se persuade ordinairement de contenter le peuple auec la ruïne du Prince. Mais quand il void qu'il est aymé & craint tout ensemble, il ne se hazarde pas aisément à vne mauuaise & perilleuse entreprise, pour les difficultez & inconueniens qui s'y peuuent rencontrer. Ausli est-il veritable que de la pluspart des ligues & conjurations qui se font, il y ena peu qui reuflissent; dautant qu'on apprehende tousiours les changemens, & que cenx qui coniurent ne le peuvent faire sans nombre de mal-contens, portez d'une esperance de vengeance ou d'un desir de nouveauté. De ceux-là quelques vns se peuvent desunir sur des considerations particulieres; ce qui donnera sujetà la rupture de l'entreprise: Pour les autres, il peut arriuer quele Prince qui en aura nouuelles en practiquera par bienfaits, qui la luy descouuriront, & ainfi elle se desliera d'elle mesme, & sera renduë vaine & sans effect. Celuy qui croira en decelant le secret remporter auec impunité vne recompense presente, preferera, s'il est sage, vn bien asseuré à vn dessein plein de hazard & de peril L'exemple en est bien particulierement remarquéen ceste grande coniuration contre Neron, si elegamment descrite par ce judicieux historien Romain. Et de verité il faut on que les coniurez soient parfaictement acquis & confidens au chef, ce qui est fort rare, ou ennemis refolus & obstinez du Prince contre lequel ils se sont liguez, & que tous ensemble gardent la foy constamment & inuiolablement pour faire succeder l'entreprise: Estant certain que tous coniurez ne sont iamais sans apprehension & sansialousie les vns des autres, sans soupçon d'estre descouuerts, sans crainte de la peine : Au lieu que du costé du Prince, la Majesté de l'Empire, la terreur des loix, la iuste vengeance qui suit ordinairement ceux qui ont de mauuais desseins, & pardessus tout la bienueillance des peuples, combattent pour sa conservation: Desorte qu'il le peut dire, que lors qu'vn Prince est bien voulu & estime de ses sujets, il doit beaucoup moins craindre, & faire moins de conte des menées & conjurations, s'iln'y trouue vn grand fondement. C'est tousiours neantmoins prudence de ne rien negliger, & le plus seur de dissiper de bonne heure toute faction qui se forme en vn Estat, & alser au deuant au moindre bruit qui en esclate. Car c'est comme vne assemblée de nüées qui peuuent enfanter des orages, des esclairs,& des tonnerres. Nostre Roy Henry III. doit seruir d'instruction à tous Princes, qui laissent croistre les ligues dans leurs Estats, &les fomentent par dissimulation, plustost que de les esteindre auec prudence & courage. Ce Prince pouvoit au commencemét couper iusques à la racine ceste puissante ligue qui s'esleua

deson temps. Il auoit aduis de toutes parts de ce qui s'y tramoit de plus secret; mais il sembloit qu'il prist plaisir à la nourrir par sa conniuence, qui alla si auant & donna vn tel aduantage fur foy, qu'apres s'estre portéà des extremitez que chacun sçait, il luy en cousta la vie par vn moschant & detestable assassinat. Le defunt Royau contraire ayant par sa valeur reconquis ce Royaume, & s'y estant affermy, aussi tost qu'il voyoit naistre quelque commencement de trouble & de division, n'auoit autre soin que de l'estouffer .promptement; & ainsi a t'il regné puissamment & paisiblement entre ses sujets: n'oubliant mesme ceste sage preuoyance d'auoir & entretenir tousiours en chacune Prouince des seruiteurs affidez qui s'informassent soigneusement de ce qui s'y passoit. Et nous pouuons dire que sans cétautre execrable & mal heureux coup qui nous le rauit, il se preparoit à des entreprises qui eussent si haut releué l'honneur de la France, que sa memoire en sera immortelle à iamais: n'ayans point d'autre consolation de ceste mort funeste & samentable, sinon de croire asseurément que la gloire de tant de belles actions estoit reseruée à noftre Roy à present regnant, lequel dés sa plus tendre ieunesse a porté des fruicts aussi tost que des fleurs, & non seulement a surmonté nos esperances, mais les hauts faits de tous les predecesseurs. Nous n'ignorons pas toutes fois qu'encor que la vertu doine rendre les bons Princes comme facrez & inuiolables, & les mettre à couuert de toutes iniures & embuches, qu'on ne nous puisse repartir de quelques exemples de Princes

& Empereurs, contre lesquels on a coniuré, quoy qu'ils fussent tres-vertueux : mais il se peut dire qu'en examinat leurs vies sans passion, il s'y trouuera des defauts & manquemens qui donnerent cause & ouuertureà tous ces attentats. Quant à Iules Cæsar, il y auroit bien de la difficulté à defendre son vsurpation tyrannique, & à condamner ceux qui coniurerent contre luy pour le recouurement de la liberté. Mais depuis quel Empire fut estably, & comme approuué du consentement de tous, en sorte qu'il sembloit que les Empereurs deussent lors viure en toute seureté, il est neantmoins remarquable que les meilleurs d'entr'eux n'auoient pas seulement à contenter le peuple, mais qui pis est, à combatre l'auarice & rapacité des soldats, qui se persuadoient d'auoir l'Empire en leurs mains, & le pouvoir donner comme electif, à leur volonté: De façon qu'apres que ce secret fut diuulgué par les Prouinces, que l'Empereur pouuoit estre creé ailleurs qu'à Rome, les soldats s'en firent croire, faisoient & défaisoient indignement les Empereurs; & l'vne des causes de leur ruyne estoit que le peuple aymoit ordinairement le repos, affectionnoit le Prince qui s'en monstroit desireux; au lieu. que les soldats aymoient la guerre, n'estimoient qu'vn Prince belliqueux, & supportoient plustost vn insolent & superbe, qu'vn moderé & paisible. Ceux donc qui n'auoient l'industrie ou naturellement, ou par artifice, de tenir les vns & les autres en bride & en deuoir, dés lors principalement qu'ils paruenoient à l'Empire, & qu'ils estoient encor tous nouucaux ·

nouueaux à commander, tomboient en mespris & couroient grand' fortune : & l'experience l'a ainsi fait voir en la personne de plusieurs miserablement tuez. Les plus fins & accorts pour se maintenir se rangeoient plustost du costé des soldats que du peuple, croyans ce party-là plus seur que de se ioindre auec vn peuple, où il y auoit plus de legereté & de foiblesse, que de force & de resolution. Et ne dira-t'on pas qu'il estoit malaisé d'accorder de si diuerses humeurs, & faire vne bonne harmonie de tons si differens? Et neantmoins il s'en est treuué de si adroits & industrieux, qu'ils ont bien sçeu auec vn doux & gracieux temperament se maintenir entre les vns & les autres. Mais ceux qui n'auoient dequoy se faire assez estimer, ou par leur valeur, ou par leur conduite, quoy que vertueux dailleurs, en perdans la reputation, perdoient bien souuent & l'Estat & la vie, soit par la reuolte & fedition des foldats, soit par la faction & coniuration de ceux qui approchoient les Empereurs. Mais auiourd'huy tous ces inconueniens cessent aux Royaumes & Principautez hereditaires, où les soldats n'ontaucune part en l'authorité, si ce n'est en l'Empire des Ottomans, où les Ianissaires s'en font croire quelquefois, ayans fait en nos iours des actes violens & furieux contreleurs Empereurs. Car pour ce Royaume, nous pouvons dire particulierement, que les exemples y sont inoüis & incogneus, & que les triftes & malheureux effets que nous auons veuz en nostre siecle de la mort de nos deux derniers Roys, ne sont point procedez de ceste cause.

Nous dirons dauantage, que les Grands sont du tout obligez & interessezà la conservation de ceste Monarchie, en laquelle ils tiennent & possedent, apres le Roy, non seulement les principaux siefs, domaines, & Iustices, mais aussi les hautes dignitez & Pairries, qui les font approchet de la splendeur Royale. Ce sont estoiles qui prennent lumiere de leur Soleil, & la perdroient aussi auec luy, souffriroient eclipse auec la sienne. Bref les Grands sont rellement attachez à la Royauté, qu'ils n'en peuuent estre separez que par sa ruyne: De sorte qu'il est impossible qu'ils ne fussent bien vnis ensemble, & ne se ressentissent courageusement contre tous ceux qui voudroient entamer vn Royaume, où ilsont si bone part, si ce n'est qu'ils fussét gaignez & pratiquez dailleurs. Ce qu'il ne faut iamais presumer d'vne genereuse & fidele noblesse, née dans l'Estat, & qui en a toussours estéle ferme appuy, & le fouftien plus affeuré. Il y en 2 qui ont creu que c'eftoit vn moyen pour bien regner, de nourrir des diuisions & partialitez entre les Grands, & se sont fondez que par là ils seront diuertis de penser autre part, mesmesauront besoin de la protection du Prince contre leurs aduer saires. Mais toutes raisons bien pesées, les sages ont iugé que c'est vn tres-mauuais & pernicieux conseil, & indigne de iustes Monarques, d'entretenir des divisions en leurs Estats. Car enfin la partiela plus foible aura recours où elle pourra pout se vanger, & remplira l'Estar de troubles & de factions. Ainsi qu'il n'est que trop souvét arrivé entre les principales maisons de ce Royaume, qui en a esté grandement affoi-

bly. C'est aussi vn dangereux precepte d'enseigner les Princes à violer leur foy, au lieu de leur apprendre à obseruer religieusement leurs promesses. Il est vray qu'il y a eu de grands & vertueux personnages qui les en ont dispensez, lors qu'il s'agist de leur perte & ruine entiere, ou bien si les promesses sont forcées. Et c'est auec ceste exception, qu'ils ont voulu limiter la regle generale: mais tousiours demeurent ils d'accord que tous Princes seront sans excuse, quand ils n'auront autre intention en violans leut foy que de profiter, & nuire à autruy, non simplement de le sauuer. Et de verité quoy que la perfidie ait quelquesfois trop heureusement reusti, neantmoins il se remarque tant d'exemples de ceux qui ont finy miserablement par l'infraction de la foy, que ces tragiques éuenemens doiuent faire apprehender tous autres qui les voudroientimiter. Aussi qui oste la foy du monde, en bannist route seureté & societé d'entre les hommes; & les Princes ont vn notable interest d'estre tenus pour Princes de parole, sans rechercher de faux pretextes pour y manquer; dautant que la verité se descouure tousiours, & paroist clairement, nonobstat tous les nuages qu'on y sçauroit opposer. C'est bien le propre des tyrans & vsurpateurs, qui n'ont ny pieté, ny iustice, de ne tenir compte de leur foy, mais non des Princes legitimes, qui craignent Dieu comme vangeur de l'infidelité. Le plus grand peril vient de ceux qui ne vont pas à descouuert, mais cachent leur ieu auec vne apparence de bonne foy, veulent paroistre gens de bien, & ne le sont pas, n'en ont que la

montre & non l'effet. Ceux-là peuuent tromper,& leurs belles paroles ont eu quelquesfois affez d'efficace pour furprendre les csprits simples & credules. On treuue assez de ces Lysandres, qui abusent les hommes auec leurs fermens. Mais toutes ces finesses & tromperies sont de peu de durée, à la honte & confufion desaucteurs, aufquelson leue bien tost le masque du visage, on leur oste le fard pour les faire voir en leur naturel ce qu'ils sont. Et n'auons-nous pas trop d'exemples regrettables de Roys, d'Empereurs, & Potentats Chrestiens, qui n'auoient en la bouche que la foy, que la pieté, ne respiroient que la paix publique; & leurs cœurs neantmoins estoient tous remplis de feintise, d'hypocrisie, & d'ambition, n'ayans fait toute leur vie que troubler le repos de la Chrestienté pour leur grandeur particuliere? Ils ne sont que trop cogneus par les histoires, sans qu'il soit besoin d'en renouveller le fouvenir : veu qu'il importe qu'il demeurent plustost dans l'oubly, & qu'il se faut tousiours seruir pour l'instruction des Princes d'exemples tous contraires. Voicy done veritablement ce qui les fait vniuersellement estimer, & qui oblige aussi tresestroitement verseux les affections des peuples. Tous Princes sont en respect & veneration, lors qu'ils font iusticesans ostentation de cruauté, qu'ils gardent la foy publique & les loix de l'Estat, viuent continemment, renoncent aux voluptez, ne dedaignent point les Grands, s'abstiennent en general du bien de leurs subiets, en desirent les cœurs, & croyent que leurs commoditez soient l'appuy & l'ornement de l'Estat,

les soulagent autant qu'il est possible, sans les trauailler de nouueaux imposts; & quand ils y sont contraints, le font auec beaucoup de moderation, mesmes ne refusent point d'y appeller quelquefois des principaux du peuple, afin de faire cognoistre la necessité presente, & que tous soient portez d'vne franche volontéà y contribuer; ainsi qu'autrefois il s'est pratiqué auec vn heureux succez, & dont par les assemblées des Estats nous en est resté quelque marque: Et quand auec toutes ces bonnes qualitez les Princesioignent la valeur, & tesmoignent par leurs actions d'estimer hautement la profession des armes, c'est lors que non seulement ils sont bien voulus & reuerez de leurs subiers, mais aussi craints & redoutez de leursvoisins. Et à la verité la vaillance est au Prince comme sa qualité essentielle, & est propremét la vertu de ceux qui comandet. Tout Prince qui a pour obiect la gloire & l'honneur, n'a point ordinairement d'autres pensées & exercices que la guerre. C'est par les armes que les hommes hardis & courageux se sont elleuez d'vne fortune basse aux plus hautes dignitez du monde. C'est la vertu militaire qui soustiét les Estats, & les met en reputation. Au lieu qu'il se void que les Princes qui se sont plustost adonnez aux plaisirs & delices, qu'auxarmes & autres actions genereuses,ont mis leurs Estats en compromis, & les ont souvent hazardez. Nous en auons l'exemple outre les estrangers, aux derniers Roys de nos deux premieres races, & pour la troissesme, en la personne du Roy Henry III. lequel changeant sa vie martiale & guerriere qui l'a-

uoit rendu glorieux en la fleur de ses ans, à vne vie oyfiue, attira fur foy le mespris des Grands, & la hayne du Peuple, & enfin se trouua tellement abandonné, que sans l'assistance du defunt Roy il couroit fortune de son Estat, qui fut lors grandement esbranlé, & mesmes, comme nous auons dit, y laissa la vie. Il n'y a point de proportion & de conformité d'vn Prince armé auec vn desarmé, d'vn Prince actif & belliqueux auec vn oisif & voluptueux; l'vn deuient mesprisé & ne se peut sier des siens, l'autre est tousioursestimé & asseuré. Et c'est veritablement ce qui donne reputation aux Princes, de se signaler par des actions vertueuses aux occasions importantes. Car la gloire des hauts faits s'espandincontinent; & lors que les subiets voyent leur Prince hardy, courageux, & entreprenant, ils le respectent & le craignent tout ensemble; ils sont tenus en deuoir & en attente de ce que le Prince voudra faireid'yne entreprise il en naist vne autre; & ainsi les subiets estans tousiours occupez & en haleine, ne peuuent auoir autre pensée que la guerre, & ne sont pas pour rien attenter contre vn Prince qui est mesme redoutable à ses ennemis. Ce n'est pas qu'il n'y ait eu en tous siecles de grands Roys, lesquels sans partir de leur cabinet ont fait autant auec la plume, qu'autres auec leur espée. Nostre Roy Charles V. en porte yn asseure tesmoignage, duquel Edouard III. Roy d'Angleterre disoit, que iamais Prince ne vestit si peu le harnois, ny monta si rarement à cheual, & iamais Prince ne luy donna tant d'affaires. Aussi ce sur ce sage Roy, qui apres nos pertes donna l'heureux comencemet de nous en releuer, & de chasser l'Anglois de la France. On peut dire le semblable de Philippes II. Roy d'Espagne, nommé à ceste cause le prudent, lequel sans sortir de son Escurial fit yn si grand remuement par le monde. Ils estoient de l'aduis de ces Empereurs Romains, à qui plaisoient dauantage les conquestes qui se faisoient auec prudence & industrie, que de viue force, de laquelle toutesfois & les vns & les autres se sçauoient bienseruir & preualoir au besoin. Et nous sçauons qu'il y a eu des Republiques, lesquelles deferoient de plus grands honneurs à ceux qui auoient composéles affaires par traictezamiables, que par la voye des armes. Aussi est-ce vne maxime, que quiconque fait mouuoir les autres est en repos. Vn premier moteur ne se meut que de soy-mesme, & n'est point en agitation par yneautre cause; autrement il y auroit progrés à l'infiny. Quant aux Princes qui se donnent entierement aux delices & aux voluptez, qui n'agissent point, qui n'entreprennent rien, qui ayment tousiours mieux estre à l'ombre qu'au Soleil, & qui ont plus agreable vne harmonie de Musique qu'vn son de trompette, bref qui desdaignent tous exercices & pensers militaires, ils ne peuuet iamais estre bien affeurez, ains plustost en soupçon & deffiance perpetuelle. Et certainement c'est vn iuste reproche & vne doublehonteà ceux qui font nais Princes, noutris & efleuez dans la principauté, de perdre leur Estat par leur peu de prudence, industrie & vigilance. Car nul n'est tombé en cét inconvenient, auquel on ne puiffe instemét imputer ces manquemés. Il ne faut point en cela prédre à partie le Destin ou accuser sa mauuaise forrune; le malest chez soy & enson proceder. Vn Prince qui n'est pas assez prudent, ne pense point lors que le temps est calme & paisible, qu'il pourra changer. preuoit point l'orage qui le menace ; tout ainsi que ceux qui en la tranquillité & bonace de la mer, ne font compte de la tempeste, qui est le commun defaut des hommes: & puis quand la tourmente les surprend, n'estans preparez à aucune resistance font vn pitoyable naufrage. Car de s'imaginer que si on tombe l'on trouvera des amis qui voudront relever & recueillir en aduerfité, c'est vne grande folie, qui trompe & abuse ceux quis'y attendent. Il n'y a rien de si miserable qu'vn Prince despoüillé, & n'y a point d'asseurace et de ressource en vn tel party, qui sera incontinét abandonné. Tout Prince donc qui ayme le repos & vnevicoysiue, doie au moins pour sa conservation veiller soigneusement au dedans de son Estat, & le gouverner en sorte qu'il soit bien aduerty de ce qui s'y passe, afin qu'au premier mouuement il puisse donner l'ordrenecessaire, & estouffer dés la naissance les ligues & coniurations quise peuvent former contre sa personne & son Estat. Comme aussi est il obligé de pouruoir si bienà ses affaires, qu'il ayt de bos&certains aduis du dehors, pour n'estre point surpris, & ne tomber aux inconueniens ausquels sont exposez les Princes qui ne sont sur leur garde, ny preparez de lon. que main contre toute sorte d'accidens. Car il ne faut pas que l'amour du repos, & d'vne vie molle & douce

les endorme & charme tellement qu'ils oublient leur seureté. Mais s'ils sont bien aduisez ils ne delaisseront d'agir, & de remüer le fer ailleurs, afin de soustenir leur reputation, ayans tousiours des forces sur pied toutes prestes pour assaillir plustost que de demeurer sur la defensiue. Nostre Roy Loys XI. en donne l'exemple, lequel mesmes sur ses derniers iours, afin d'éuiter le melpris de ses subiets & de ses voisins, remüoit mesnage de toutes parts, dépeschoit ambassades vers les Princes estrangers auec vne curiosité extraordinaire, pour tenir yn chacun en crainte de sa personne & de les desseins. Et à la verité un sage Prince ne doit point quitter en temps de paix l'exercice des armes, & laisser refroidir l'ardeur des siens. Car quoy que la guerre ne se fasse que pour l'esperance de la paix, si faut-il neantmoins qu'vn Prince soit tousiours armé pour se maintenir, & preparé durant la paix à la guerre, & qu'en ces deux diuers temps sa prudence & sa valeur reluisent également. Ce que les anciens nous ont voulu signifier par leur Pallas armée, & par leur Iupiter guerrier & politique tout ensemble. Disons particulierement pour ce Royaume, que nostre nation est de soy belliqueuse, & qui a besoin d'employ, ayant esté recogneu par experience, qu'il n'y en a point do plus courageuse au monde, ny plus capable de discipline militaire, lors qu'elle est sagement conduite. Et auec cela estant le Royaumess fort peuplé, n'est-il pas bien à propos d'en oster & repurger vne multitude de fai-neants & vagabonds qui se porteront au mal, se ier-

teront aux larcins & brigandages, ou aux factions' intestines, s'ils ne sont perpetuellement occupez ou à la guerre, ouà autre exercice semblable? N'est-ce pas yn esfet de prudence d'yser de ceste diuersion? Et ne sçauons-nous pas comme ces grands Connestables du Guesclin, de Richemont, & autres, nous en ont laissé de signalez exemples, qui ont heureusement succedé au bien de l'Estat, & qui doiuent seruir d'enseignemens à la posterité? Or les armes auec lesquelles vn Prince defend & soustient ses Estats, sont ou les siennes propres, ou les estrangeres, ou meslees de toutes les deux. Tout Prince qui se fonde sur le secours d'autruy n'est ramais asseuré. C'est vn grand secret de ne dependre que de soy & de sa propre vertu: estant certain qu'vne puissance qui n'est point appuyée sur ses propres forces, n'est de longue durée. Les exemples en sont communs aux siecles passez, & l'experience nous a fait voir au nostre, que les forces estrangeres font ordinairement dangereuses, & l'auons ainsi trop recogneuen ce Royaume à nos despens. Car le soldat de ceste qualité, soit mercenaire ou auxiliaire, n'est pas le plus souuent susceptible de discipline, mais promptà reuolte & fedition, nomément le mercenaire, qui n'est interessé qu'autant que la paye le mene. Et de verité c'est chose bien rare & extraordinaire, qu'il vueille franchement mourir & se sacrifier pour la querelle du Prince qui le soudoye, & qu'il s'y passionne auec yne ferme resolution. Ilse donne au Prince lors que la guerre n'est pas encor bien eschauffée, il combatta par vanité, sur la table vn Alexandre,

ne respirera que menaces, publiera le triomphe auant la victoire; & lors qu'il faudra venir à bon efcient aux mains, & porter les fatigues & incommoditez de la guerre, vous le verrez incontinent se relascher & se débander, & perdre ceste vigueur & audace premiere. Car commeil n'est attiré que par l'esperance du gain, & n'a pour but que la proye, non la grandeur & lagloire du Prince qui le paye, on peut dire sans doute ques'il s'expose courageusement aux occasions, c'est plus paraccident que par vne vraye valeur, ny par affection qu'il porte à ce Prince. Dailleurs toutes armes estrangeres sont suspectes à ceux-la mesmes qui s'enseruent; de sorte qu'ils entrent quelquesfois en telleialousie & désiance des Chefs, qu'ils sont contraints ou des en défaire par voye ouverte, ou de s'en deliurer par quelque autre façon que ce foit, dont il n'y a que trop d'exemples. Et ne fut-ce pas vn traict bien remarquable, que l'aduis qu'en mourant dona aux Venities leur general Bartolomeo Coglione, qu'ils se gardassent bien de confier iamais toutes leurs forces entre les mains d'vn seul, comme ils auoient fait à sa personne, pour les inconueniens qui en pouuoient naistre ? On sçait trop où l'ambition & la cupidité de regner porte les hommes, qui seront tentez sur quelque apparét subicat, & passeront le Rubicon à tous perils & hazards. On peut dire dauantage, qu'il y a toufiours du danger ou en la vertu, ou au peu de valeur & lascheré des forces estrangeres. Car si elles sont vaincuës, le Prince qui en aura esté secourusera au mespris, outre la fortune qu'il courra d'estre ruyné : si elles sont victorieuses, il est à leur discretion & misericorde. Les Romains ont bien sceufaire leur profit de ce dernier, ayant pied à pied subiugué ceux-là mesmes qui les appelloient à leur secours. C'est la fable du cerf & du cheual. Et nous sçauons que les Turcs par ceste voye ont passé en l'Europe, & se sont faits maistres de l'Empire de Constantinople; tout ainsi qu'auparauant eux, les Gots & autres nations Septentrionales, apres auoir feruy quelques Empereurs, & esté à leur solde, ruynerent & saccagerent l'Empire Romain. Mais outre qu'il y a peu de gloire d'attendre son salut des armes d'autruy, que c'est vne vraye marque defoiblesse, & qu'il faut tousiours beaucoup souffrit en ceste extremité, voicy vn inconuenient tres-sensible & inéuitable. C'est que tout Prince qui met son appuy aux forces estrangeres, & neglige les siennes, & ne s'en sert point comme de principales, rend ses peuples lasches & pareffeux ; de forte que n'estans dressez à l'exercice des armes, ils deuiennent faineants & inutiles; & ainsi le Prince est au hazard d'estre la proye du premier conquerant. On attribue à ceste faute la nouvelle ruyne del'Italie; parce que s'estans les Princes Italiens reposez sur les estrangers, ils ont premierement perdu leur reputation,& en suitte la pluspare d'entr'eux leur fouueraineté. Resoluons donc qu'il n'y arien de plus feur, & de plus ferme que d'estre fondé sur ses propres. forces, auec lesquelles on a tousious veu que les Prinees qui en ont esté armez ont acheué de hautes entreprises Nostre Roy Charles VII. ayant par sa vertu

& bonne fortune, chasse les Anglois, & recognoisfant combien il importoit d'estre armé de sa propre puissance, establit sa gendarmerie composée de cauallerie & infanterie Françoise. Son fils le Roy Loys X I. au lieu de l'infanterie se seruit de Suisses, & le fift pour des confiderations particulieres, & en hayne de la maison de Bourgongne. Cela depuis a esté suruy, & a causé autant de mal que de bien, au jugement des plus vaillans & mieux sensez. Car ayant Loys XI. donné credit à ceste nation vrayement belliqueuse,& qui a fait de grands seruices à ceste Couronne, il a diminué & comme aneanty la reputation des siens, obligeant la cauallerie à combatre & s'vnir auec les Suisses; tellement qu'il semble autourd'huy que fans eux on ne puisse rien faire. Les estrangers mesmes nous reprochent ceste faute, nous tenans inuincibles si nous nous seruons de nos propres forces, & si nos foldats sont aguerris, comme facilement ils le peuuent estre. Nous auons dit, & est vray, que nulle nation n'est plus capablede discipline que la nostre. Il n'y a que l'art & l'industrie de la sçauoir bien conduire & mesnager. Les guerres des Pays bas en seruent de preuue, où nos François ont paru non seulement vaillans & courageux, mais des mieux disciplinez. Et feroit-cepas vne grand honte, & vn manquement fort reprochable, que nostre Françe pouuant fournir des millions de guerriers, qu'aulieu de les employer, on ayt recours, nous ne dirons pas aux Suisses, car il font autourd'huy comme toints & incorporez auec nous par vnealliance & confederation tres estroite,

mais qu'on allast acheter bien cherement le secours d'autres estrangers? On dit qu'il est donné à peu de cognoistre & de preuoir le mal auant qu'il soit arriué; dautant que bien souuent souz l'apparence du bien le mal est caché; & c'est veritablement l'effet d'une rare prudence de penetrer les éuenemens des causes: Mais quand l'erreur est descouuert & bien aueré, n'est-ce pas vne manifeste imprudence de le continuer: On a autrefois imputé aux François, qu'ils estoient bons pour conquerir, & non pour conseruer; c'està dire, qu'ils auoient plus de valeur que de conduite : Mesmes on marque vne faute signalée en nostre Roy Loys X II. que pouuant estre seul arbitre de l'Italie, il yassocia pour compagnon le Roy Ferdinand d'Arragon, qui apres trouua moyen de le supplanter auec vn partage du tout inique, lequel seruit à ietter les fondemens de la grandeur Espagnole. Mais auiourd'huy que ceste vertu militaire, qu'on croyoit estre comme esteinte & enscuelie parmy nous, s'est rallumée & ressuscitée plus que iamais, tant durant le regne du defunt Roy, que de nostre Royà present regnant, duquel les actions sont autant de merueilles, ne deuons nous pas esperer que la Iustice accompagnant ses armes, elles seront tousiours benies & fauorisées de Dieu, & couronnées de toute sorte de prosperitez ? Et quelle plus haute louage peut receuoir vn Prince, que d'estre recogneu & publié par tout le monde pour puissant protecteur de sesalliez, liberateur des peuples assligez, & comme arbitre de la Chrestienté? N'est-ce pas auec tous ces

. grands aduantages que nostre Roy s'est acquis vne vraye gloire, a surmoté l'enuie, & remply ses mains victorieuses de palmes & de lauriers ? Et ne peut-on pas dire que tout est ouvert à vn grand Roy, lequel armé de sa puissance, & fortifié de sa iustice, & ayant tousiours vne bonne caule & vne bonne espée, ne treuue rien deuat luy qui luy puisse resister? Aussi ne void-on pas que lors qu'il marche à la teste de ses armées, assisté de sa Noblesse incomparable en valeur, tous gens de guerre iusques au moindre soldat, redoublent leur courage, & en deuiennent plus resolus, sçachans que leur Roy est spectateur & iuge tout ensemble de leurs actions? Nous dirons sur ce subject que les plus grands & experimentez Capitaines ont resolu vne question tant de fois agitée, & soustenu qu'vne bonne armée sans vn bon chef ne reüssira ia-mais ; plustost deuiendra-t'elle insolente & seditieuse, lasche & éneruée; de sorte qu'il y aura toussours du perilà la mettre en œuure: Et au contraire qu'on doit auoir beaucoup plus de confiance en vn Chef braue & vaillant, qu'en vne armée destituée de bon chef, quoy que de soy courageuse & capable de bien faire. L'histoire seule de Crassus, défait par les Parthes, en sert de tesmoignage : Et c'est ce qui est naïuement representé par vne armée de Lions conduite par vn Cerf, ou vne armée de Cerfs conduite par vn Lion. La raison est, qu'vn mauuais General d'armée se peut difficilement corriger, & est come incurable; aulieu qu'vn genereux & plein d'experiéce pourra en peu de temps si bié instruire, exercer & façonner ses soldats,

qu'ils seront inuincibles. C'est ce que firent ancienne -. ment auec tout heureux succez vn Marius, vn Sylla, vn Lucullus, & tant d'autres. Bref nous pouuons dire, qu'en guerre vn bon Chef en vaut dix mille, & deuonstenir pour oracle la voix de ce braue Roy, qui repartit si dignement à celuy qui luy disoit que les ennemisestoient en beaucoup plus grand nombre qu'eux; Et moy, luy dit-il, pour combien me comptes-tu? Mais quand non seulement le Chef, mais aussi les membres sont tous estimables & recommandables pour leur vertu, comme nous pouvons sans vanité donner ceste louange aux nostres, n'est-il pas vray qu'vne armée ainsi composée est redoutable à tout le monde, & donnera la loy à tous ses ennemis? Nous toucherons yn poinct que nous iugeons de tres-gran-de importance, dautant que des plus grands hommes & plus courageux y ont failly. C'est que le faux obiect & apprehension d'vne iniure receuë, ou d'vn vice qu'on reproche, emporte quelquesfois les plus vertueux, & les precipite à des effets dont ils se repentent aprestout à løisir. Cela vient d'vne trop grande mollesse, & est vne des taches de ceste mauuaise honte blasmée par tant d'excellens personnages, qui en ont fait des traictez exprés pour nous en guarir. Car au contraire vn Prince prudent fera peu de conte d'encourir le reproche d'vn vice qui sert à le maintenir, & sans lequel il ne pourroit sauuer son Estat. On 2 condamné Pompée, & fortiustement, de ce qu'il ne pouuoit souffrit d'estre moqué, ny qu'on mesdist de ses actions. Et c'est ce qui le fist departit de ses sages con-

conseils, & hazarder contre son intention ceste grande bataille de Pharsale, où il s'agissoit de l'Empire Romain & de la liberté, de peur d'estre appellé le Roy Agamemnon, & le Roy des Roys, & qu'on luy imputalt que pour sa grandeur particuliere il voulust prolonger la guerre. En quoy il fit vne faute, au iugement des sages, que ne doit pas commettre vn simple Pilote de nauire, qui se laisseroit emporter aux clameurs de quelques ignorans passagers; tant s'en faut qu'il soit pardonnable à vn general d'armée, mesmesà celuy sur lequel la Republique se reposoit entierement. On loue le medecin qui n'vse point de complaisance vers ses malades, pour s'accommoder à leurs appetits & volontez déreglées. Et que dira-t'on du grand Pompée dont la tente estoit appellée le Senat, de s'estre laissé vaincre à la moins saine partie de son armée, craignant de luy déplaire, là oû il estoit question de la vie & du salut commun? Quelle loüange merite au contraire ce tant renommé Fabius, lequel sans se soucier des crieries& rumeurs populaires, & sans rien hazarder, non par vne mollesse & pesanteur hors de saison, & comme entre les Atheniens fut iustement blasmé leur souuerain Capitaine Nicias, mais temporisant sagement, sauua Rome des mains d'Annibal, & en remporta le tiltre glorieux de Bouclier de l'Empire ? Vn ieune Chef d'armée peut bien estre dissuadé & diuerty d'vn sage conseil, par les importunitez ordinaires de ceux qui luy representent que c'est honte & lascheté de ne combatre pas, mais non celuy qui est experimenté &

aguerry, qui s'en moquera, & se gardera bien de commettre ceste faute d'exposer vn Estat au hazard d'vne iournée, & mener les siens à vne perte toute éuidente: De l'vn vient la seureté, & de l'autre la ruyne. Les batailles que nous auons perdues tant dedans que dehors le Royaume par la faute des Chefs, qui auoient plus de courage & de chaleur que de prudence & de conduite, nous doiuent rendre sages & aduisez à nos despens. Disons encores que ceux-là sont grandement louez, lesquels lors qu'il s'agist de sauuer la patrie ne trouuent aucun party difficile & qui se doiue refuser. On sçait le traicté d'Arras de nostre Roy Charles VII. auec Philippes Duc de Bourgongne, & comme ce Roy bien conseillé pour deliurer la France des Anglois, sescent tres-prudemment accommoder. Son fils le Roy Loys X I. suivit l'exemple du pere, traictant auec Edouard IV. Roy d'Angleterre. Le Seigneur de la Trimouille composa dextrement auec les Suisses à Dijon, & destourna ce torrent impetueux qui venoit inonder la France. Car apres l'orage passe on peut en meilleur temps auoir raison de ses ennemys, & imposer la loy à ceux qui se seroient voulu preualoir de leur aduantage, & abuser de leur bonne fortune. Il y a vn autre vice qui n'est pas moins blasmable & quelquesfois ruineux, dont tout grand Prince se doit garder; c'est l'opiniastreté. On reprochoit à Agesilaüs, qu'ayant trouué l'Estat de Sparte au plus haut de sa gloirequand il sut esseu Roy à l'exclusion d'vn autre pretendant, il l'auoit laissé dechoir par vn proceder opiniastre & importun contre les Thebains,

qui malgré eux assaillirent cét Estat, & l'esbranlerent li fort que iamais depuis il ne s'en peut remettre ny releuer. Dirons-nous vn mot des forteresses, & si elles font necessaires en vn Estat Monarchique ? Les Princes qui ont plus de crainte de leurs peuples que de leurs voisins se doiuent veritablement remparer de forteresses; mais ceux qui se fient plus en leurs peuples qu'ils n'ont peur des estrangers, les doiuent abbatre & ruïner, si ce n'est aux frontiers du Royaume. Et c'est vne veritable maxime qu'il faut plus craindre la hayne des subiects, qu'il ne se faut asseurer en toutes les forteresses. La citadelle d'Orleans apres la mort de Henry de Loraine Duc de Guyse, fut-elle pas cause de la revolte presque vniuerselle de la France ? Vn bon Prince aura pour principale forteresse, comme nous auons touché, l'amour & bienveillance de son peuple. Aufli se souviendra-t'il tousiours de ce cuir representé à Alexandre le Grand par ce sage Indien, pour luy seruir d'instruction de faire sa residence principale au milieu de ses Estats, & se tenir ordinairement au centre plustost qu'aux extremitez; tout ainsi que le cœur & les parties vitales d'yn corps doiuent estre plus soigneulement confortées que les autres. Mais n'est-ce point trop parler de guerre & des armes, qui sont hors de nostre profession? Et ne deuons-nouspointapprehender le iuste reproche que fist Annibalà cét importun Phormio, qui luy en vouloit donner des regles? Et toutesfois ce qui nous iustifiera, c'est que nous ne faisons que rapporter icy fort fidelement ce que nous auons appris & recueilly

des escrits & memoires des plus grands hommes & plus consommez en la milice, tant anciens que de nostre temps de toutes qualitez, & qui l'ont non seulement releucé par leurs hauts faits d'armes, mais ont pris la peine de nous en laisser tant d'vriles & excellens preceptes. Or dautant que les Princes ne sont pas tousiours en guerre, ains iouissent le plus souuent de la douceur de la paix, nous leur marquerons aussi comme ils doiuent auoir soing en ce temps paifible de se nourrir & dresser curieusement à toutes sottes d'exercices qui ressent leur Prince genereux. La chasse est l'image de la guerre; & outre que par cét exercice vn Prince s'accoustume & s'endurcistau tranail, il apprendencore tres-vtilement l'asfiette des païs & des lieux particuliers, & s'acquiert la cognoissance de diuers hommes. Dauantage, les Princes les plus belliqueux ne doiuent point dédaigner de le reposer quelquesfois dans le sein des Muses, puis que c'est par leur faueur que les plus glorieux ex-ploits de guerre sont consacrez à l'immortalité. Donc leur principale & plus agreable occupation à quel-ques heures de leur loisir, doit estre de s'addonner aux histoires, & particulierement à celles de leur Estat; considerer les actions des hommes illustres & en paix & en guerre, examiner les causes d'vne victoire, ou de la perte d'une bataille, afin d'imiter les vertus des vns, & éuiter les fautes des autres; & par ce moyen le former sur le patron & exéplaire de tous ces grands Princes, Roys, & Empereurs, qui ont dominé au monde. Ainsi Alexandre le Grandauoit son Homere, le grand Scipion son Polybe, vn autre son Xenophon; & on elcrit de Lucullus que par la lecture des histoires, auec son bon sens & entendement, il se rendit, quoy qu'inexperimenté auparauant, l'vn des premiers Capitaines de son temps, & défit deux grands Roys par deux moyens tous contraires. L'Empereur Charles V. auoit choisi nostre Philippes de Comines; bref tout grad Prince fait ordinairemet election selo son humeur de quelque celebre Historien, & le prend pour guide de ses actions. Aussi les Princes feroient faute d'oublier en temps de paix de visiter soigneusement leurs Prouinces, & recognoistre les villes principales de leurs Estats; mais tousiours auec ce dessein qu'en voyageant ils n'entrent en aucunes des villes, qu'ils n'y laissent quelque marque de leurs vertus, soit de liberalité, soit de iustice, soit de clemence, ou autre, afin d'accroistie leur gloire, se signalans par quelque action eminente, qui donne d'eux vne bonne impression au peuple. Nous dirons particulierement pour nos Roys, qu'ils ont vn tres-grand interest de se monstrer amateurs de la vertu de leurs subiects, & iustes estimateurs de leurs merites en toute sorte de professions. Q'ils doiuent prendre soin des arts & des sciences, gratifier les hommes doctes, & leur tesmoigner vne bienveillance particuliere: Ne doiuentmespriser ce qui appartient au commerce & à la marchandise, mais plustost la mettre en prix & en honneur, auec toute sorte de manufactures; bref fauoriser, comme on a commencé, les nauigations tant necessaires pour la grandeur du Royaume, & em-

braffer tout ce qui y peut apporter de l'vtilité & de l'ornement; & à ceste fin accorder auec liberalité les priuileges, exemptions, & recompenses, qui excitent les subiects à toutes louables entreprises, & inuitent les estrangers às vnir & associer auec eux. Ce qui feruira non seulement pour remplir le Royaume d'v-neabondance immense & infinie de tous biens, & y conseruer l'or & l'argent qui se transporte ailleurs; mais qui plus est à employer les inutiles, faineants & vagabonds, desquels il faut tant qu'il est possible descharger les Estats. On a douté si le Prince doit permettre les ieux & spectacles publics, au moins ne les defendre pas absolument, pourueu qu'il n'yait rien de dissolu & d'illicite. Vn sage ancien nous en a parlé tres-accortement, & appris que ce qu'on attribuoit à faueur & humanité, fail oit bien souvent vne partie de . la seruitude. Car non seulement on contente par ce moyen & on entretiet les peuples, mais aussi on les diuertist d'autres mauuailes pensées. C'est leur faire gouster à peu de frais & sans hazard des fruicts d'vne heureuse paix. Et nous sçauons que ce grand Empereur Auguste, & d'autres excellens Empereurs ses successeurs, non seulement les permirent, mais eux mesmes y assisterent quelquesfois pour gaigner le cœur des peuples, en gardant tousiours neantmoins leur dignité & maiesté inuiolable, sans se démettre & abbaisser, & encores moins se familiariser que rarement & bien à propos, afin d'éuiter le mespris. Et deverité tout sage Prince doit apporter tout le soin & diligéce qui luy serot possibles, pour donner en ge-

neral & en particulier toute sorte de satisfaction à son peuple, & que tous puissent estre contens de l'estar & gouvernement present. Passons aux finances, dont nous parlerons peu; dautant que nous en auons bien particulierement traicté au Discours que nous addressandefunt Roy apres la reduction de laville d'Amiens en son obeissance. Nous dirons seulement, que bien qu'il soit plus louable & mieux seant à vn Prince d'estre liberal que noté d'auarice, que toutesfois s'il se veut maintenir, sa liberalité doit estre tellement reglée & mesurée, qu'il éuite les despenses inutiles & superfluës, & n'ait soin que des necessaires. Autrement, il consommera ses moyens en peu de temps; ses coffres seront changez en vaisseaux des Danaides, & sera contraint pour fournir à sa profusion de surcharger son peuple. C'est ce qui le rendra incontinét odieux, & le reduira à mauuais party. Car ayant auec sa prodigalité appauury plusieurs de fes subiects, qui enseront demeurez offensez, & enrichy peu de personnes trop foibles pour le garantir, n'est-il pas veritable qu'il courra fortune de tomber en quelque inconvenient? Où au contraire le mesnage, l'ordre, & l'espargne le rempliront de toutes sortes de commoditez, sans dependre d'autruy, & auoir recours à des moyens extraordinaires. Et ce qui est de plusimportant, il tiendra toufioutspar ce bon ordre ses subiects en deuoir, ses voisins en crainte, & estonnera tous ses ennemis. Mais pour arriver à ce bien-là le Princeest obligé de faire vn bon choix de personnes fideles qui manient ses finances auec integrité; en

quoy reluira vn effect notable de sa prudence. Nous ne desnions pas que ceux qui ont voulu pretendre & aspirerà quelque Principauté ne se soient ordinairement ouverts le chemin par la liberalité & magnificence, afin d'acquerir des seruiteurs confidens, & se faire suiure; mais il est vray qu'apres y estre paruenus, s'ils ont esté lages, ils ont bien seu mesnager & conseruer ce qu'ils auoient acquis; autremétils n'eussent peu longuement subsister; n'y ayant source si feconde qui ne s'espuise incontinent par les dépenses profuses & excessives. A la conqueste du bien d'autruy il est permis de se monstrer liberal, pour se concilier l'amour des peuples. Les conquerans ont tousiours fait ainsi: & le grand Alexandre prenant resolution d'aller contre les Perses, donna mesmes aux siens le domaine de fon Royaume, pour les obliger plus estroitement, & ne se reserva que l'esperance: Mais apres qu'on est estably, il faur estre recenu en ses dons & liberalitez, si on veut durer. On a dit auec raison, que la France estoit par dessus tous autres Royaumes fauorablemét regardée du Ciel, que c'estoit le vray pattage & comme le preciput du filsaisné de l'Eglise, les délices de la terreà cause de la fertilité & abondance des biens inespuisables que Dieu-nous donne, outre le nombre infiny d'un peuple propre à toutes sortes d'exercices & de profestions; bref qu'elle estoit l'appuy des amis, l'asyle des opprimez, la terreur des ennemis: 11 n'y a que l'ordre le mesnage qui nous soiét necessaires, & qu'on a perpetuellement desirés en ce Royaume pour le rendre heureux. C'est l'ordre qui maintient & conferue

serue toutes choses, & sans lequel aussi les plus florissansEstats rombét en ruyne& decadence. C'est à quoy tous lages Princes doiuent soigneusement pouruoir, afin qu'auec l'affluence des commoditez que le bon mesnage apporte, ils ayent plus de moyen de soulager leurs peuples. Novs ne deuons oublier que ce qui a tousiours donné lustre & grand poids au gouvernement de tous Estats, est d'y auoir veu les Princes sidelemet seruiz de bons & vertueux Conseillers, lesquels on peut nommer sous l'auctorité du souverain, les vrays organes & instrumens de la felicité publique. Vn historien Romain rapporte d'vn ancien aucteur politique, qu'vn Royaume est plus heureux & plus seuremet gouverné auquel le Prince est vicieux, mais ses Conseillers bons & sideles, que celuy où le Prince est bon, & ses ministres & Conseillers d'autre qualité. La raison qu'ils en rendent, est qu'vn mauuais Prince peut estre ramené par plusieurs bons, mais que plusieurs mauuais & corrompus, ne peuuent estre corrigez par vn seul qui est bon. Et qui ne sçait que ceste question a exerce l'esprit de beaucoup de grands personnages partiz en opinions pour la diuersité des raisons qui se peuuent representer de part & d'autre? Nous nous contenterons de dire, que comme le Prince donno la loyà tout ce qui depend du maniement de son Estat, qu'il estabsoluement l'arbitre de ce qui s'y passe, qu'vne des marques aussi plus asseurées de son iugement est le choix de ses principaux Ministres & Conseillers: N'y ayant rien de plus important & plus necessaire que de sçauoir bien conoistre, si ceux

qui le seruent en ses conseils, sont suffisans & fideles. Car s'ils sont autres, ou qu'ils n'ayent que l'vne de ces deux qualitez, on rabatra beaucoup de la bonne opinion du Prince, qui ne sera iamais seruy comme il est desirable. Et quoy qu'on die que l'ignorant est plus dangereux que le meschant, parce que la cause de l'ignorance est perpetuelle, & celle de la meschanceté ne l'est pas; pouuant le meschant varier, & se porter quelquesfois au bien par des respects & considerations particulieres, au lieu que l'ignorant ne change point; fiest-cequ'enfait d'Estat, l'homme ignorant, s'il n'est entierement stupide & priué de sens commun, est plus supportable, moins dangereux qu'vn perfide & meschant, qui trahiroit le seruice de son maistre. C'est vn grand malheur aux Princes de faillir en vn poinct de telle consequence, & est trop veritable qu'on en a veu des Estats ruinez, & d'autres bien esbranlez. Les enfans du grand Theodose qui souffrirent tant du mauuais choix qu'il auoit fait de Rufinus & Stilico, en seruent d'exemple bien exprés, outre tant d'autres qui se remarquent en tous Estats. Or quant à la suffisance elle n'est pas égale, & yen a de plusieurs degrez. Ceux qui entendent par eux mesmes sont rares & excellens, & au premier degré de perfection, pourueu qu'ils ne soient ny temeraires, ny presomptueux; mais qu'ils sçachét prudemment balancer les affaires, & qu'il y ait, comme on dit, autant de phiegme que de feu en leur temperament. Ceux qui le sçauent simplement conduire selon l'instruction qu'on leur donne, estans susceptibles d'intelligence, peuvent estre tolerables, & ne sont pas à rejetter s'ils sont sideles, & que la probité accompagne touliours leurs negociations. Mais les autres qui n'entendent solidement ny par eux, ny par autruy, qui manquent à la principale partie, qui est le jugement, & ne delaissent toutesfois de presumer de soy, ne sont bons à rien, & leur service est du tout inutile, & quelquesfois dangereux & preiudiciable. La vraye pierre de touche pour esprouuer vn seruiteur, est de recognoistre où il porte ses actions. Car si on void qu'il pense plus à soy qu'à son maistre, & prefere son interest particulier à celuy du public, il est mal-aisé de s'y confier; & ce sera prudence d'esloigner des affaires un tel ministre. Aussi quand on recognoist vn seruiteur entierement porté d'affection à bien faire, & qui postpose courageusement toutes choses au seruice & à la grandeur de son maistre, il l'y faut encore plus estroitement lier par toutes fortes de faueurs & de bienfaits, tousiours neantmoins proportionnez à sa qualité & condition > tant afin qu'il n'en abuse point, & ne mette les autres en ialousie, qu'afin qu'il ait perpetuellement quelque chose à desirer; en luy departat par mesure les honneurs & richeffes, en telle sorte qu'il apprehende auec raison du changemét en la fortune& en l'estat du Prince, auquel il se voidainsi esleué; & aussi qu'il ne soit pas assez puissant pour ofer rien entreprédre & attéter contre le seruice du maistre, quand il en autoit la volonté. Il y a des Princes qui font tenus prudés, parce qu'on dit qu'ils croyent & suiuent bon conseil. Mais

ceste élection procede autant d'eux mesmes comme bien aduisez, & sçachans bien choisir, que d'autre cause exterieure. Car c'est vne maxime certaine, que qui n'est sage & prudent par soy mesme, ne peut estre bien conseillé, n'estant susceptible d'vn bon ou mauuais aduis qu'on luy donne, & d'en faire distinction & difference. Si le Prince se remet entierement à la perfonned'vn seul, qui le gouverne & le possede, & que celuy là soit tres prudent & experimenté aux affaires, l'Estat pourra estre bien conduit & gouverné : Mais si ce consident n'estoit sidele & homme de bien, & qu'ilse rendist trop puissant, il y auroit du peril, commeil est arrivéde nos Maires du Palais. Disons encores que si le Prince se conseille auec plusieurs, & qu'il trouve son conseil divisé en opinions, ainsi qu'il aduient souvent, il est sans doute que s'il n'a vn grand iugement pour bien choisir & prendre le meilleur party, ses conseils seront ordinairement fluctuans & incertains. Car ne pouuant de luy mesme faire élection du meilleur, & chacun des Conseillers ayant pour obiect quelque consideration particuliere, il sera tousiours en hazard d'estre trompé & mal. feruy. De sorte qu'il se peut dire, que bien qu'il soit grandement souhaitable & aduantageux à tout Prince d'estre accompagné & fortissé d'vn bon conseil, que neantmoins les bonnes resolutions naissent plustost de la prudence & iugement du Prince qui sçait bien choisir, que la prudence du Prince des bons conseils. Il est vray que ceste prudence estaiguisée par les diuerles raisons qu'il entend, qui seruent tou-

iours de grande instruction pour l'éclaircissement & resolution des affaires. Mais pourquoy a-t'on feint que Minerue deesse de Sapience estoit née du cerueau de Iupiter sans autre conionction, sinen pour monstrer que les Princes doiuent auoir des leur naissance vne sagesse infuse en leurs ames, sans auoir besoin de l'ayde & ministere d'autruy? Et ne sont ils pas appellez particulierement les enfans de Iupiter, comme estans inspirez d'enhaut, & esclairez des plus pures & plus divines lumieres? Et ne pouvons nous pas dire à la gloire de nostre Roy, que sa valeur & sa prudence qu'on void reluire également en ses actions, semblent disputer & combatre à qui demeurera le prix d'honeur? Adioustonsauec vn veritable éloge de son Conseil estroit, qu'il ne s'y treuue rien à desirer, soit pour le courage, soit pour la suffisance, ou pour la fidelité, & qu'en vn mot ceux qui y seruent sont tous dignes Ministres d'vn grand Roy, & que celuy d'entr'eux qui est éminent par dessus les autres, est aussi pardessus toute louange. Les heureux succez nous en donnent des preuues tres-asseurées, tout ainsi qu'on iuge des effets par les causes. Car quoy que la fortune air esté bannie du conseil des Dieux, pour nous apprendre qu'il ne faut pas tousiours faire iugement des conseils par les éuenemens, siest ce que lors que nous voyons toutes choses conduites aucc vne prudence & dexterité singuliere, & que la iustice qui les accompagne les rendencores plus plaufibles & fauorables, nous auons subiect de bien esperer de l'issuë de tels conseils, & que Dieu les benira; comme aussi luy a-

F iii

t'il pleu de les faire prosperer auec des graces speciales & extraordinaires vers nostre Roy, tant au dedans qu'au dehors du Royaume. N'oublions point que les Princes doiuent rousiours tenir leurs conseils sifecrets, qu'on ne puisse faire fondement sur leurs deliberations, moins encores fur les resolutions. Celuy qui disoit qu'il eust brussé sa chemise si elle eust sceu son secret, monstre combien il le iugeoit necessaire. Et cet autre grand Prince qui respondit si rudement à fon fils qui luy demandoit quand il feroit partir l'armée: As-tu peur, luy dit-il, de n'entendre pas le son de la trompette? Ainsi pouuons-nous dire qu'aux affaires de grande importance, il est plus seur de ne se confier qu'à vn seul, ou à peu, qui soient recogneus pour tres-fideles, afin que les fecrets ne foient point éuentez: Encores d'autres renuient, & tiennent que le vray moyen qu'vn conseil soit secret est que le Prince ne le descouure à personne. Ce qui monstreroit toutesfois vne trop grande défiance, lors principalement qu'on est bien asseuré de la fidelité des fiens. Aussi tout sage Prince doit bannir de sa Cour toutes sortes de flateurs, qui font souvent plus de tort & de preiudice que les ennemis. Il se faut tant qu'il est posfible preseruer de ce dangereux poison, lequel on auale facilement. Ce sont ces gens-là qui ostent bien souvent aux Princes la reputation, & les mettent en mespris. Ce sont les bestes priuées dont ce sage ancien disoit que tous Princes se doiuent plus curieusement garder, que de bestes sauuages. Or asin de prendre vne voye toute contraire, il est bon que tout

le mondes çache qu'on peut dire au Prince franchement & seurement la verité; qu'il ayme à l'entendre, qu'il hayt la flaterie & toute forte de déguisemens, ne s'offense point de la voix libre d'vn homme de bien, pourueu qu'elle soit accompagnée du respect, qui est tousiours deu à la personne du maistre, & qu'on luy fasse iuger que telle remonstrance procede plustost d'vne sincere & loyale affection, qu'elle ne ressent son blasme & son reproche. Les Prophetes mesmes, lors qu'ils ont parlé aux Roys, nous en ont donné l'exemple par leurs discours destournez, par les figures & paraboles dont ils ont vsé: Bref vn Prince prudent ne perdra iamais à écouter ceux qui auront reputation de probité & de sagesse en son Estat. Cen'est pas qu'il doiue estre indifferemment permis à toutes fortes de personnes de parler aux Princes, si ce n'est aux choses importantes & secrettes, où il ne faut rien omettre, rien differer, nymelmes reietter les moindres du peuple, ains leur doner en telles occurrences vn libre & gracieux accez. Celuy qui remit les affaires an lendemain, & tant d'autres qui n'eurent la curiosité, ou plustost la prudence d'escouter les aduissalutaires qu'on leur donnoit, y ont perdu la vie: car quelquesfois vn bon aduertissement sauue le Prince. Tousiours faut-il grauement peser ceux qu'on reçoit, les digerer meurement & à part, considerer d'où ils viennent, n'en prendre l'alarme que bien à propos, & auoir ce soin de gaigner le bruit d'estre secret, parce qu'autremét les plus affectionnez s'effaroucheroient, & ne retourneroient plus à donner de semblables

aduis. No v s nous pouuons maintenant recueillir & dire, que tout Princeappuyé & soustenu de si bons & seurs moyens pour bien regner, comme sont la religion, la iustice, les armes, & les finances, & qui d'ailleurs estassisté d'un bon conseil, ne doit rien craindre, peut tout entreprendre, sera tousiours aymé & reueré des siens, & redouté de ses ennemis. Et qui nous peut dénier ce tesmoignage veritable, que nostre Monarchie ne se soit maintenue depuis douze cens ans fur tous ces puissans appuis? Dieu nous ayant donné de temps en temps des Roys pieux, iustes, sages, susceptibles de bon conseil, & belliqueux tout ensemble : & aucuns d'eux tellement reglez, & si bons œconomes & dispensareurs des finances du Royaume, que non seulement le peuple en a estésoulagé, mais le Royaume enrichy & fortissé, auec l'estonnement de tous nos voisins? De sorte qu'il ne nous reste qu'à redoubler nos vœux à sa diuine bonté, afin de nous continuer ses graces & benedictions par vne suitte perpetuelle de bons Roys. Nous acheuerons par les nouveaux conquerans, & dirons veritablement que ce n'est pas tousiours ny à la vertu, ny à la bonne fortune, qu'on doit attribuer les heureux succez des grandes entreprises. On y employe quelquesfois de mauuais moyens, & n'y a eu en tous siecles que trop d'hommes hardis, qui ont logé en leurs ames ceste opinion de Cesar, qu'il ne faut point craindre de violer le droict & la iustice pour regner. Aussi ont-ils couru sa mesme fortune, & c'est miracle s'ils en sont eschappez, & qu'ils ayent duré longtemps.

temps. Car de mettre en œuure la perfidie, la cruauté,. & autres meschansactes, pour seruir à son ambition, il est du tout indigne non seulement d'vn Chrestien, mais d'un homme vrayement genereux. Est-ce vertu pour vsurper vne domination tyrannique, de mailacrer ses citoyens, bannir ses anciens amis, ruïnet & esteindre tous ceux qui peuuent nuire, changer l'ordre ancien ; bref estre sans foy, sans pieté, sans religion, ainsi que quelques mauuais & dangereux politiques ont voulu enleigner aux Princes? Est-il pas veritable que quiconque acquiert vne principauté par telles voyes, non seulement perd la gloire qui procede des actions vertueules, mais està toute heure expose à toutes sortes de perils, auec vne hayne vniuerselle des peuples? Les exemples en sont trop communs en tous les siecles. Et quoy qu'il s'en soit treuué de si prudens, qui apres s'estre rendus maistres de leur païs ou de celuy d'autruy, en ont bien vsé & conuerty le mal en bien, toutes fois estans si rares, il seroit hazardeux d'en faire colequence & de les imiter. Pour le regard des conquestes fondées sur quelque pretexteapparent, & qui ne sont point destituées de cause legitime, foit pour recouurer le fien, foit pour vne iuste reuanche, on ne delaisse pas d'y rencontrer beaucoup d'espines & de difficultez, & faut que plusieurs choles concurrent pour s'y maintenir. On a veu souuent des conquerans arrestez tout à coup au progrez de leur grandeur. Ils auoient ietté des fondemensd'une haute puissance, & l'edifice commençoit à paroistre & s'éleuer auec vne admiration publique; maisen vn instant, soit pat mauuaise conduite, ou autre accident inopiné, tout est tombe en ruine & en precipice. On comparoit vn ancien Roy à vn ioueur de dez, qui a tantost beaucoup, & puis il n'a plus rien: Aussi bien souvent les conquettes mal establies & ordonnées viennét à neant. Tout conquer at qui se veut affermir en vn nouuel Estat, doit trau ailler à gaigner creance de toutes parts, se faire plus aymer que craindre des peuples, se faire suiure & estimer particulierement des soldats, se monstrer magnanime & liberal, plus clement & humain que seuere & cruel, entretenir bonne amitié & correspondance auec ses voisins; bref faire en sorte que ses subiers soient contens de fa domination, s'y plaisent & s'y accommodent d'vne franche volonté, & qu'ils ayent toussours besoin de ses graces & faueurs. Les villes & citez, qui ont de tout temps vescu comme libres, se rendent moins faciles & disposées au changement, & pour sauuer leur reuolte prendront toussours pour excuse de ne pouuoir patiemment souffrir vn nouueau ioug; comme aussi est-il mal-aise d'oublier ny par la longueur du temps, ny par nouueaux bien faits, qui n'effacent iamais les vieilles iniures, la douceur d'vne ancienne liberté. Autre chose est des peuples accoustumez à viure sous les Princes & Potentats souverains, qui se rangent aisément à la nouueauté, & desquels on se peut bienmieux asseurer que des citez libres, qui se ressoutiennent tousiours du temps passé, & nourrissent en leurs cœurs yn violent desir de le reuoir ; de forte qu'elles seront capables à la premiere occasion

de se débaucher. Un des plus seurs remedes à cét inconvenient est d'y envoyet des colonies, qui seront autant de garnisons & comme les cless d'vn Estat; ainsi qu'il s'est heureusement pratiqué entre les Romains. Car de se défaire des chefs, ruïner les principaux des peuples, comme ont fait quelques nouueaux coquerans, & se seruir du precepte de celuy qui coseilloit de couper & abbatte les testes des pauots, outre qu'il seroit tousiours perilleux & difficile, c'est vne barbarie & cruauté sauuage qu'il faudroit exercer sur beaucoup d'innocés cotre toutes loix & meurs Chrestiennes. Aussi a-t'on remarqué auec grande raison, que si les Estats nouvellement assuiettis sont d'autre langue & d'autres coustumes que celles du conquerant, il les doit gouverner d'vne autre façon que ceux qui sont de mesme langue & mesmes loix, & y apporter beaucoup d'art, d'industrie & de prudence pour s'y conseruer. Le meilleur expedient qu'on a treuué, est que le conquerant y aille resider en personne quelque saison de l'année, & y fasse semblablement de nouvelles colonies: Mesmes il y en a qui ontiugé tres à propos d'obliger les peuples conquis à parler la langue du conquerant, afin de les mieux appriuoiser, comme pratiquoient d'ordinaire les Romains, qui estendoient leur langue auec leur domination. Et dauantage, que le coquerant sçache mettre auec dexterité és mains des nouveaux habitas les charges principales & plus importantes, abaisse doucement les plus puissans qui auront resisté à son entreprise, sans toutesfois les reduire au desespoir,

éleue ceux qui y auront ay dé & qui seront manife-stement interessezauec luy. On a toutes fois obserué que ceux qui n'estoient pas au commencement de l'intelligence du conquerant, n'ont delaissé quelque-fois de le bien seruir ; comme se ressentant obligez d'effacer auec leurs bonnes actions la mauuaise & sinistre opinion qu'on pouuoir auoir d'eux; & a t'on veu par experience, que lors qu'ils ont esté bien conduits, on les a treuuez aussi fideles & affectionnez que nuls autres, quoy qu'auparauant ils eufsent défauorisé l'entreprise, mais non pour autre raison, que parce qu'ils aymoient l'Estat où ils auoient esté naiz, & comme pris racine: Au lieu que ceux qui auoient seruy vn Prince en sa conqueste, non pour amour qu'ils luy portassent, mais pour . estre mal-contens & mal-edifiez du gouvernement, se sont treuuez d'ordinaire plus difficiles à entretenir, & a t'on eu plus de peine à les contenter que d'en acquerir de nouueaux. Les Estats fondez de longue main & d'vne grande suitte & reuolution d'années, où les souverains sont bien recogneus, n'ont point besoin de toutes ces precautions: Car en ceux là il suffit d'estre maistres des cœurs plustost que des corps, pour regner seurement & heureu-sement. Il y en a encores qui ont estimé que c'estoit vn puissant moyen pour se concilier la bienveillance publique, de laisser viure les peuples nouuellement subjuguez sous leurs loix & coustumes;en establissant toussours quelques personnes affidées constituées en dignité, qui veillent sur les actions

de tous, & en soient comme garents & responsables. Et à la verité c'est vne maxime consirmée par l'vsage, que pour introduire de nouuelles loix en vn Estat, il faut estre armé de pouuoir & d'auctorité; De sorte qu'vn Prince qui n'est pas encores bien estably, quoy que desireux du vray honneur, & de la restauration des bonnes meurs, ne doit pas si tost se declarer, pour penser remettre les choses en vn bon ordre, & en vn estat desiré des plus gens de bien. Carne sçait-on pas comme ceste precipitation a ruiné plusieurs Princes, & entreautres ce vertueux Roy de Sparte Agis, lequel voulant restablir auec vne generosité admirable la discipline Laconique, & n'estant le plus fort, & n'ayant bien pourueu à ses affaires, y perdit mal-heureusement la vie? Et Lycurgue auant luy auoit-il point couru la mesme fortune ? Bref les Gracques furent-ils pas tenus à Rome pour des seditieux, & leur memoire condamnée ? Ainsi à plus forte raison, quiconque n'aura bien lié sa partie, auant qu'entreprédre de rien changer aux meurs & coustumes des peuples nouuellement concess, se treuuera, quoy que son intention soit droite & iuste, non seulement frustré de son esperance, mais au hazard de sa personne. Et c'est pourquoy on a donné pour precepte & instruction à tous ceux qui veulent reformer vn Estat, & y planter & establir de bonnes loix, & par là nous finirons, de retenir tousiours au moins quelque ombre & image de l'antiquité, de la quelle les peuples G iii

6.1

font ordinairement ialoux, si ce n'est qu'on y voye clairement vn erreur inueteré, qui repugne à la raison, qui blesse le public, & soit vniuersellement prejudiciable.

FIN.